

20-9-2024

## Tiada bantuan kewangan buat mangsa banjir di Pulau Pinang - KM



TASEK GELUGOR - [DIKEMAS KINI] Tiada penyaluran bantuan wang tunai kepada mangsa banjir di negeri ini.

Ketua Menteri, Chow Kon Yeow berkata, kerajaan negeri tidak mempunyai dasar untuk menyalurkan bantuan wang tunai kerana sukar untuk mengenal pasti mangsa-mangsa banjir yang sebenar.

"Kita tak ada dasar sedemikian (bantuan kewangan) kerana selama ini kita susah nak kenal pasti siapakah mangsa banjir.

"Mengikut apa yang diamalkan sebelum ini, penubuhan pusat pemindahan banjir adalah tujuan untuk memindahkan mangsa-mangsa banjir kilat ke pusat ini dan bantuan seperti makanan dan minum serta khemah tempat rehat dan tidur disediakan seperti biasa," katanya ketika ditemui pemberita selepas merasmikan pembukaan pakej 12A, Loji Rawatan Air Sungai Dua, di sini pada Jumaat.

Kon Yeow berkata, melihat kepada perubahan cuaca yang semakin pulih, beliau menjangkakan orang ramai yang masih ditempatkan di pusat pemindahan sementara (PPS) akan boleh pulang ke kediaman masing-masing dalam tempoh sehari dua lagi.

Pada Jumaat seramai 556 mangsa banjir dari 152 keluarga masih ditempatkan di tujuh PPS yang masih dibuka di negeri ini.